

La punt amez il lai da S. Maria

■ (rtr) Mo mintga quattertemprass èsi da vesair la punt da l'anteriura via che manava dal fons da la val sin il Pass dal Lucmagn. Tenor l'Axpo saja stà l'avrigl 2010 l'ultima giada ch'ins haja vis la punt en il lai da fermada S. Maria sin il Pass dal Lucmagn. Uss èsi puspè uschè lunsch. En il lai ha quai actualmain uschè pauca aua che la punt romana, che manava avant passa 50 onns il traffic sur il Rain da Medel, è da vesair. Gist dasperas eran da lez temp er ina chaplutta e l'ospizi S. Maria cun ulteriurs bajetgs. Quels na ves'ins betg perquai ch'els èn vegnids disfatgs avant ch'il lai è vegnì emplenì 1968. L'emprim ospizi da S. Maria ha la claustra da Mustér laschè construir 1374 (Val Medel, 1996). Ils bajetgs ch'èran sco ultims en quest lieu var dus kilometers sut l'aut dal Pass dal Lucmagn èn dentant

betg stads uschè vegls. La part nova datava dal 1918. *Mariuschla Derungs* (83) che ha lavurà sco camariera durant intgins onns fin 1962 en l'ospizi sa regorda: «I era fitg simpel, per betg gist dir



Mariuschla Derungs cun dus giasts avant l'ospizi.


MAD

primitiv.» Tut eria fitg vegl, ma ella lavurava gugent là. I eri sco ina famiglia. Mariuschla Derungs ha er emprendì d'enconuscher a S. Maria ses um. Lez lavurava a Stgegia sco chauffeur da camiuns. L'october 1962 ha ella lura maridà ses Felix e quai sa chapescha en la chaplutta da S. Maria e lura fatg la festa en l'ospizi. Nua ch'els dus èn lura era stads sur notg. Ma las chombras eran veglias e letgs in sper l'auter, quai n'avevi betg, quinta Derungs cun in surrir. 1965 è l'ospizi nov sin l'aut dal pass vegnì avert. Lura han ins era cumenzà cun la construcziun dal lai da fermada. Quel è stà a fin 1968. L'ospizi vegl, la chaplutta ed ils bajetgs datiers èn vegnids spazzads. Il sulet ch'è restà è la punt e quella dat, sco quest onn, anc perditga dals blers tschientaners che l'ospizi era anc en quest lieu.



En il fons dal lai da S. Maria è da vesair la punt romana.

FOTO RTR, G. HUONDER



L'ospizi vegl da S. Maria avant passa 50 onns.